



Uunga  
Inatsisartunut ilaasortaq  
Tillie Martinussen  
Demokraatit

**Isumaginninnikkut immikkut ittumik iliuuseqartoqarnissaanik § 37 naapertorlugu  
apeqqummut akissuteqaat**

29-06-2016  
Suliap nr.  
2016 - 9977  
Allagaatip suussusia Nr.  
3037258

Asasara Tillie

Postboks 260  
3900 Nuuk

Isumaginninnikkut immikkut ittumik suliniuteqartoqarnissaanik apeqquteqaaternut  
qujavunga

Oqarasuaat (+299) 34 50 00  
All (+299) 34 66 66  
E-mail: iian@nanoq.gl  
www.naalakkersuisut.gl

Akissutigisakka ataani takuneqarsinnaapput.

**1. Naalakkersuisut suliniutit suut ingerlanniarpaat isumaginninnermut suliat  
kinguaattooqqasunut, tamatuminnga nuna tamakkerlugu nakkutilliinikkut  
nalunaarusiat, soorlu Tasiilami meeqqat pillugit suliat 520-it?**

Siullermik erseqqissaatigineqassaaq Ilaqutariinnermut, Naligiissitaanermut,  
Isumaginninnermut Inatsisinillu Atuutsitsinnermut Naalakkersuisoqarfik Tasiilami  
isumaginninnermi ingerlatsivimmut nakkutilliinikkut nalunaarusiorsimammat.  
Naalakkersuisoqarfik nuna tamakkerlugu nakkutilliinikkut nalunaarusiorsimangilaq.

Tasiilami inunnik isumaginninneq pillugu nakkutilliinermik nalunaarusiaq tunngavigalugu  
Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut  
Naalakkersuisoqarfiup nakkutilliinermik nalunaarusiami ajornartorsiutit  
taakkartorneqartut suliarineqarnerisa nanginnissaat pillugit Kommuneqarfik Sermersooq  
oqaloqatigilersimavaa.

Kommune Kujallermut tunngatillugu kommunip Ilaqutariinnermut, Naligiissitaanermut,  
Isumaginninnermut Inatsisinillu Atuutsitsinnermut Naalakkersuisoqarfik qinnuigisimavaa  
sulisutigut ikiorseqqulluni innuttaasunik sullissineq aamma kommunimi  
isumaginninnermi ingerlatsivimmi sulianik sullissineq pitsaangorsarniarlugu. Tamanna  
tunngavigalugu Naalakkersuisoqarfimmit Kommune Kujallermit suleqatigiinnissamik  
isumaqatigiissusiarsimavoq, taassuma ilaatigut kinguneraa pisariaqartinneqartumik  
sulianik sullissinerup qulakkeerneqarnissaa pillugu, tassunga ilanngullugit meeqqanut-  
inuussuttunullu suliassanik suliarinninnerit, Kommune Kujallermut sulisunik  
aallartitsisoqassasoq.

Tamakku saniatigut Ilaqutariinnermut, Naligiissitaanermut, Isumaginninnermut  
Inatsisinillu Atuutsitsinnermut Naalakkersuisoqarfiup Qaasuitsup Kommuniani  
isumaginninnikkut sulianik suliarinnittarneq pillugu ikiorsiissuteqarneq immikkut  
aalluppa. Tamatumunnga tapertatut Naalakkersuisoqarfiup akisussaaffeqarfiit arlallit

sulissutiginiarlugit Qaasuitsup Kommunian suleqatiserisimavaa. Siullertut CR Qaasuitsup Kommuniani illoqarfinni Qaanaami, Upernavimmi, Qeqertarsuarmi aamma Kullorsuarmi angalaarsimavoq meeqqanut inuusuttunullu sulianik sullissinermi ilinniagalittut ikiorsiartorluni.

Aappaattut Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoqarfik Qaasuitsup Kommuniani suliat pillugit martsimi 2016-imi isumasioqatigiitsisimavoq. Isumasioqatigiinnermi siunertarineqarpoq kommunimi aalajangiisartut aamma allaffissornikkut sulisut ataatsimoorlutik kommunimi unammiligassanik oqaloqatigiissutiginnissaat, tassungalu atatillugu sulianik suliaqarnermi ajornartorsiutit kiisalu suliat pitaannarlugit suleqatigiissinnaanermut akornutit pissusissamisoornerpaamik qanoq iliorluni aaqiivigineqarsinnaanersut oqallisigalugu. Septembarimi 2016-imi nangitsilluni isumasioqatigiitsisimavoq, tassani ilaatigut kommunimi unammiligassanik aalajangersimasunik aaqiissutissatut siunnersuutissat suliarineqassallutik.

Tamakku saniatigut Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoqarfik CR-ip ataani ukiumi ataatsimi atorfimmi suliniummi sulisussamik atorfinitsisimavoq. Suliniummut sulisussaq Ilulissaniissaaq. Suliniummut sulisussap suliassaraa Qaasuitsup Kommuniata kommunimi meeqqanut-, inuusuttunut-, aamma ilaqutariinnikkut suliniutaasa ataqatigiissaarneqarnissaat. Ilanngullugu Suliniummut sulisussap qulakkiissavaa, kommunip aamma Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoqarfiup kommunimi meeqqanut-, inuusuttunut aamma ilaqutariinnikkut suliniutaasa tamakkiisumik takuneqarsinnaanissaat.

## **2. Naalackersuisut eqqarsaatigissanerpaat Kommuunit kattullugit ataatsimeeqatigissanerlugit, inuiatta unammiligassaat aammalu isumaginninnermut suliassat kinguaattooqqaneritut atatillugu?**

Naamik, Naalackersuisut kommunit tamarmik ataatsimeeqatiginissaat eqqarsaatersuutiginnilaat. Aaqiissutissanik najukkami pissutsinut aamma suliniutinut aallartinneqareersimasunut naleqqussakkanik aaqiissuteqarnissamut qulakkeerinninnissaq siunertarlugu Kommunit ataasiakkaarlugit oqaloqatigineqartarput.

Maanna tikillugu Ilaqutariinnermut, Naligiissitaanermut, isumaginninnermut Inatsisinillu Atuutsitsinnermut Naalackersuisoqarfimmit inunnik isumaginninnermi sulianik suliaqarnermut atatillugu Qaasuitsup Kommunian aallussaqaarfigaa. Tamatumunnga tapiliullugu Naalackersuisoqarfiup ilaatigut suliniutit aallarnisarsimavai, soorlu apeqqut 1-mut akissuteqaammi taaneqartut.

Tamakku saniatigut Naalackersuisoqarfik soorlu oqaatigineqartut, Kommuneqarfik Sermersooq oqaloqatigivaa aammalu inunnik isumaginninnermi sulianik suliaqarnermut pillugu Kommune Kujalleq suleqatigiinnissamik isumaqatigiissuteqarfigisimavaa.

**3. Naalackersuisut sulianut kinguaattooqqasunut immikkut ittumik suliniummik aallartitsiniarnerlutik, aammalu aallartitsisoqassappat naatsorsuuteqarnerlutik qanoq akisutiginiarneranik?**

Apeqqu 1 aamma 2-mut akissuteqaatit takukkit.

**4. Naalackersuisut pilersaruteqarnerlutik isumaginninnermut sulianut tunngasumik ataavannerusumik ningaasalersuinissamut, kinguaattoortoqannginnissaa anguniarlugu aammalu ilinniartitaanikkut sulilersitsisarnikkullu Naalackersuisut suliniuteqariarnerlutik suliamut tulluuttumik sulilersitsinissamut qulakkeerinnittussamik?**

Siunnersuineramik assistentit ilinniagaqarneq (rådgivningsassistentuddannelse) Kommune Kujallermut aamma Tasiilap eqqaanut kingusinnerpaamik 2017-imiit aallartinneqartussat neqeroortigineqarnissaa pilersaarutaavoq, Siunnersuineramik assistentit ilinniagaqarneq ilinniarnuvoq modulikkaarlugu aqqissuussa, taanna Ilaqutariinnermut, Naligiissitaanermut, Isumaginninnermut Inatsisinillu Atuutsitsinermut Naalackersuisoqarfimmit aamma Iisimatusarfimmit suleqatigiinnikkut pilersinneqarsimasoq. Ilanngullugu naatsorsuutigineqarpoq, najukkami isumaginninnikkut siunnersortit ilinniagaqarnermi holdit nutaat 2017/2018-imi aallartinneqassasut.

Kiisalu Ilaqutariinnermut, Naligiissitaanermut, Isumaginninnermut Inatsisinillu Atuutsitsinermut Naalackersuisoqarfimmit Meeqqanik ikiorsiineq pillugu Inatsisartut inatsisissaattut siunnersuut pillugu tamanut tusarniaaneq nassiussimavaa, naatsorsuutigineqarporlu inatsisissatut siunnersuut Inatsisartut 2016-imi ukiakkut ataatsimiinneranni saqqummiunneqassasoq. Inatsisissatut siunnersuummi ilaatigut isumaginninnikkut suliassat pineqarput.

Inussiarnersumik inuulluaqqusillunga

Martha Lund Olsen